



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tiryimyim@aolima

tir yimyim

TAPAK 7

Home affairs Parliamentary panel
züngsem asütsü P Chidambaram shimogo

US ya China nungi pilatsü
meranger masü: Raimondo



VOL. XX NO. 318 (ADOK 318) DIMAPUR RASEMNÜ (WEDNESDAY) LUROI (AUGUST) 30, 2023 ₹ 5.00

Nagaland nung Tele-MANAS maparen tenzükogo

Kohima, August 29, 2023 (DIPR): Nagaland nung mental health teyari agütsüsü atema Tele-Mental Health And Neuro Science (Tele-MANAS) tenzükogo. Iba ya Azadi Ka Amrit Mahotsav kübok tenzükö.

Mission Director (NHM) Dr. Ritu Thurr-i August 29, 2023 nü State Mental Health Institute, Kohima nung Tele-MANAS tenzüküsü.

Dr. Ritu Thurr-i mental health indang onük jembidang emotional, psychological aser social well-being dak sendakba osang lemsatep.

"Tele-MANAS ajanga mental health services aser iba teyari nüngdakertem tajungba sendakteptsür. Technology amshia Tele-MANAS ajanga mental health support aginürtem balaka bendanga amshiba tangatetba agientsü meranger" ta Dr. Ritu Thurr-i ashi.

State Mental Health Institute nung Senior Medical Officer (SMO) Dr. Nuvotso Khesoh-ia mental health tayongzükbatem aser mental illness indang tebilemtsü lemsatep.

"Alima nung tekolok manemba ajanga shirang aser matamabensaba khuret teimba adokdaksür. Alima nung shirangtem rongnung depression aser anxiety ya khuret tulu ka kümogo" ta Dr. Nuvotso-i ashi.

"Linük nung Tele-MANAS takok ngua benshir. October 2022 nungi iba mapa tenzükba sülen toll-free helpline nung 200,000 calls tema aruogo" ta National Mental Health Program Deputy Director Suyimtenla Jamir-i ashi.

"Tele-MANAS nung tetsürtemi teimba shilem agir anungji teburtemia shilem agitsü asoshi teinyaktsü asenok aika lir. Nagaland nung mental health tayongzükbatem rongnung exam stress, addiction, unemployment, lack of family support amalakang ajurur" ta Suyimtenla-isa metetdaksü.

Tele-MANAS ya eSanjeevani den sendakteper. Iba ajanga tele-counseling centers lapoker aser iba nung video conferencing ajanga mental health professionals aser nisungtem sendakteper" ta Dr. Rupert Pesevie-ia ashi.

Advisor Imkong-i Union Minister Tomar den ajurutep

Dimapur, August 29, 2023 (TYO): Soil & Water Conservation, Information & Public Relations Advisor Imkong L Imchen den department ketdangsurtemi New Delhi nung Union Minister for Agriculture Narendra Singh Tomar den ajurutepa senden ka menogo.

Senden nung Advisor Imkong-i Nagaland nung department ajanga mapa balala inyakba osang lemsatep.

Paisa Union Minister Tomar dang Agriculture Ministry dangi New Project/proposal abenbatem agizüktsü mepishia metetdaksü.

Department ketdangsurtemia Nagaland nung Central Scheme inyakba aser taküm financial year atema Centre dangi abenba onüktem lemsatep. Idangji Union Minister Tomar-i Nagaland yaritsü nangzük.

(Maneni tapak 2 nung...)

MoS Darshana Jardosh-i Chümoukedima district semdang



August 29, 2023 nü Union Minister of State for Railways & Textiles Darshana Jardosh-i Chümoukedima district nung Administration aser Heads of Offices den senden amenba angur.

Dimapur, August 29, 2023 (TYO): Union Minister of State for Railways & Textiles, Darshana Jardosh-i August 29, 2023 nü Chümoukedima district nung Administration aser Heads of Offices den senden ka amen.

DoNER-i tuyuba ama lai North East nung state ajak semdangtsü ta Darshana-i ashi. Lai anogo asemnü atema Nagaland semdang aser anogo tanabuba nung Chümoukedima District semdang.

Chümoukedima District nung inyakba aser khurettem meteter Centre sorkar dangi abentsü atema lai semdang ta Union MoS Darshana-i ashi.

Iba senden amenba sülen lai Dhansiripar village nung fly shuttle frame looms lema agütsü aser SAMARTH training program, Eri Rearing village aser sericulture farm lapoktsü.

Maneni Darshana-isa Diezephe craft village, Sovima M/S Heirloom Naga aser HL&HC

Design & Development centre semdang.

Laisa Chümoukedima nung Dragon fruit farm aser Kirha village nung Jan Jal Mission semdanga liasü.

Hombarnü Darshana Jardosh-i Kohima nung handicrafts emporium ka lapoktsü aser state BJP lennirtem den rakhi among.

"Nagaland nung handicrafts tajung aika lir" ta lai Nagaland Women Vocational Training Institute Emporium lapoktsüba sülen ashi.

Lerie nung lapokba Emporium ya Ministry of Textiles ajanga teyari agütsür.

"Iba emporium nung alibatem ya Nagaland nung tetsürtemi yanglutetba lir aser parnok ya Vocational Training Institute ajanga training agütsüba lir" ta Darshana-isa ashi.

Laisa Kisama Heritage Village semdang aser nübertem dang 2023 travel list nung Kisama

Heritage Village semdangtsü aser Hornbill Festival nung amongtsü tayongzükba agütsü.

Yashi lai state BJP lennirtem den senden ka amen aser idangji Centre-i Nagaland nung infrastructure, tourism, education aser employment ajanga terenlok bentsür arutsü merangba osang lemsatep.

Laisa state BJP lennirtem den Raksha Bandhan among aser idangji state BJP president Temjen Inna Along aser lennir Kropol Vitsu na nem 'rakhi' alenloksü.

Laisa BJP MP S Phangnon Konyak aser Chief Minister Neiphiu Rio na den ajurutepa liasü.

Maneni, Union MoS Darshana Jardosh-i Chedema, Kohima nung 37 Battalion BSF semdanga Raksha Bandhan among.

Battalion Headquarter nung sentong balaka ayonga agidang Darshana-i BSF sepaitem nem Rakhi alenloksü.

Manipur Assembly Session minute 11 dang agi; State indang tebilemtsü mejembi

Guwahati, Imphal, August 29, 2023 (Agencies): Manipur nung May 3, 2023 nungi tensa mejungi akümba sülen tanü mezüng atema Assembly session ka ayonga agi saka minute 11 nung dang tembangogo.

Tanü Manipur Assembly Session nung tesüiba ita pezü tashi raratepa aruba onük benoka mejembi saka Session tembangdang "olemteper aser Constitution ajanga melaba ama" yimjung mapa inyaktsü bangzüng ka renem.

August 21 nü summons ka agüja anogo ka session ya kanga dang aritepa ayongzükka agiogo. Legislative Assembly indang session ana tsüngda ita 6 dak tali tetsüngda malitsüla ta temzüng lateta lir aser Manipur nung September 2 nü iba anogo abensatsü. Iba jagi 'Constitutional requirement' ka ama tanü session agiogo.

Manipur nung züngsem 60 agi akümba assembly nung Kuki-Zomi MLA 10-i security khuret ajanga Imphal-i maruteter ta shia tanü session nung maden. Ajisüaka, Naga MLA 10 dena tanüngba MLA ajak denogo. Legislative Assembly

ketdangsurtemi assembly nung bangzüng renemba ta ser sangdong agütsüba atema Manipur Congress president aser MLA K Meghachandra Singh-i ashishitepogo.

"Iba bangzüng ya Speaker-i zünga-a mesayu aser House nung olemteper kecha maliasü" ta Meghachandra-i ashi.

Assembly Secretary ajanga tanü List of Business agütsüba nung business onük ana dang liasü. Ka tasürtem bilemteta tetushi agütsüba aser Chief Minister Biren Singh-i Business Advisory Committee Report agütsütsüba dang liasü.

Tanep 11:00 ako nung Speaker Thokchom Satyabrata menden nung mener session tenzükli Congress Legislature Party leader aser taoba Manipur CM Okram Ibobi Singh-i Session jazükba atema ashishitepa lungkak ait.

"Iba ya asayamenüba asü? Asenoki democracy kümzükdi, asenoki Constitution kümzükdi" ta Ibobi Singh-i ashi.

Paisa anogo ka Assembly session agiba nung ashishitep aketba lemsatep. "Governor-i anogo 15 jelia sangdong agüja

Session agir saka tan Session atema iba amaji meinyak. Kechiba iba ya special mesüra emergency session ka ama mejazük?" ta pai asüngdang.

Idangji tanüngba Congress MLA 4-i Ibobi den külemi 'Save Democracy, Save Constitution' tezülubatam amer yimyim ayima lungkak ait.

Assembly session nung asaprangtepaka CM Biren Singh-i asürtem bilemtetba onük benok aser minute ana ola madoki akhüm agütsütsü ashi. Saka Congress MLA temi tashi mangai ola adoka lungkak ait.

"Manipur nung mepetmesü onük ya okadak benoka lir anungji House nung benoka mejembitetsü. Rules of procedure nung iba onük atema olemteper balaka alitsü nüngdak madoker" ta CM Biren-i ashi.

Opposition züngsemtemi asatenba mapang Biren Singh-isa Chandrayaan-3 Moon mission indang jembi aser pai scientists o Prime Minister dang pelaba metetdaksü.

CM Biren-isa Manipur kübok Thanga nungi Dr Raghu Ningthoujam iba mission nung shilem agiba indang jembi.

Congress MLA temi ola adoka lungkak aitba ajanga Speaker-i session tenzükö minute 9 dang süiaka minute 30 atema senden khen anena atatsü tetuyuba agütsü.

Iba sülen senden tanaben tenzükdang Congress MLA temi lungkak aitsü tenzük aser minute 2 dangi agirbo Speaker-i assembly senden tembang.

Taoba mapang Congress-i assembly session ji anogo pungubosa agitsüla aser Manipur tebilemtsü benoka olemteptsüla ta takhangba agüja liasü.

"Congress MLA temi yimya tamajung benshiba ajanga assembly nung Manipur dak sendakba onüktem benoka mejembitet. Iba atema sasaa bilemer. Manipur Congress MLA temi Parliament session nung par lennirtemi inyakba jilu benshir. Parnoki President's Rule dak alaka kecha maginür. Rahul Gandhi-ia Manipur nung President's Rule benoknüba shiogo. Kechiba parnoki iba tebilemtsü atsülanga odaktsünür" ta minister Govindas Konthoujam-i senden atemba sülen osangbener den jembidang ashi.

Ajisüaka, BJP den yariteper teloktemia Session shitak magiba atema mepelaba metetdaksüogo.

Manipur BJP sorkar den yariteper National People's Party (NPP) MLA kati session ji democracy alema agiogo aser sorkar den yaritepertem den kecha melemsatep ta ashi.

"Onok ajak NDA aser North-East Democratic Alliance (NEDA) nung dena lir. Tanü agitsüba business ji senden tenzüktsü lia dang MLA tem nem agütsü. Onoki session koma agitsü'ar kecha memetet liasü. Parnoki aginüba ama rule aser procedure ajak alema inyakogo. Public-i lemtet tajung ka agitsü atema olemteper lidaktsünür. Session tembangba sülen bangzüng ka sangdongbajia coalition partners-i kecha memetet aser iba ya democratic inyakyim alema lir" ta NPP MLA-i ashi.

"Manipur assembly session ji tenüng atema agiba dang liasü. Session anogo ishika ka ali asübo BJP sasep nung meputep aliba temai adokla" ta Congress lennir Jairam Ramesh-ia metetdaksüogo.

State Level EMRS Cultural & Literary Fest 2023 kaogo



State Level EMRS Cultural & Literary Fest 2023 nung shilem agirtem külemi tangokba noksa ka yangi angur.

Dimapur, Luroi/August 29 (TYO): State Level EMRS Cultural & Literary Fest sentong EMRS School Diphupar, Dimapur nung August 29, 2023 nü agia liasü. Iba sentong nung Tizit Mon District, Tuensang aser Diphupar nungi EMRS School temi shilem agia liasü, kong kaketshir 78-i

telemsa balala nung toktepa liasü. Iba tetoktepba nung champion temi National Level EMRS Competition nung Nagaland tenü nung tokteptsü. *Tetoktepba balala nung Champions tem yamai alitsü:*
1. Group Folk Dance: EMRS Tizit

2. Story telling (Folk tales): Ngipom H Konyak, EMRS Tizit
3. Creative writing: Yanglechuba Y Chang, EMRS Diphupar
4. Recitation: Chongmei, EMRS Tizit
5. Painting: Puchio Herrick P, EMRS Tuensang.

Dimapur nung PMSVANidhi indang awareness campaign ayongzük

Dimapur, Luroi/August 29 (TYO): Ministry of Housing and Urban Affairs (MOHUA) totuyuba nung anidaka State Bank of India, RBO ajanga District Urban Development Agency (DUDA), Dimapur aser Dimapur Municipal Council den lungjemer August 25, 2023 nü Regional Office Complex- SBI, Super Market, Dimapur nung Prime Minister Street Vendors' Atmanirbhar Nidhi (PMSVANidhi) Scheme

indang awareness campaign ka ayongzüka liasü. Street vendors nem PMSVANidhi scheme nungi tajangzük anguba tali tejangjaba nung angatetdaksütsü, application tasen anioktsü aser street vendors tem nem digital transactions amshidaksütsü nükjidong nung iba campaign ya ayongzüka liasü. Iba sentong nung street vendors tasen 49 tenü zülüok aser parnok rongnung 37-i PM

SVANidhi loan meshia liasü. PMSVANidhi ya Ministry of Housing and Urban Affairs ajanga senotsü teyari agütsüba scheme ka lir, aser iba ya special micro-credit scheme, koba June 2020 nung tenzüka liasü. Iba scheme yagi COVID-19 lockdown sülen street vendors tem parnok indang business tenzükshitsü asoshi küm ka atema sen 10,000 tashi aputsür aser ano tetemlok tajemba nung sen aputsür.

Tuensang nung Millet Festival mungogo



GHSS Auditorium Tuensang nung August 29, 2023 nü Millet Mela alidang Deputy Commissioner, Tuensang, Lithrongla Tongpi Rutsa-i Millet recipe tendangba noksa nung angur.

Dimapur, Luroi/August 29 (TYO): Nagaland State Rural Livelihood Mission (NSRLM) aser Government Higher Secondary School (GHSS) Tuensang Lower Section lungjemer International Year of Millet nung shilem ka ama August 29, 2023 nü Millet Mela munga liasü. Iba sentong ya GHSS Auditorium Tuensang nung agi

as er Deputy Commissioner, Tuensang, Lithrongla Tongpi Rutsa tesemdanger tongti liasü. Iba Millet Mela nungya Millet recipe competition liasü, kong Noklak Block, Chessore Block, aser Panso Block ajanga mezüngbuba, tanabuba aser tasembuba jenjang nguteta liasü. Iba sentong nung menden Hongsangsonla, AC, Livelihood

Sangsangnyu liasü aser Thrikyuse Sangtam, ADPM Tuensang ajanga tarur pela agizükba o jembi. Kasa sentong nung Ebou Chang, BDO Sangsangnyu, aser Tsalito, In-Charge GHSS Lower Section nunger temia o tatsütsü jembia liasü aser Sepila M Sangtam, District Functional Specialist ajanga melepzüng o jembi.

NSF-i Noke Wangnao asükhu lemsatep

Dimapur, Luroi/August 29 (TYO): Nagaland nung legislator tem rongnung tambosang aser Advisor, Social Welfare, Government of Nagaland, Noke Wangnao asüba asoshi kanga sasar, ta Naga Students' Federation (NSF) sangdong ka ajanga ashi. Asür Noke Wangnao ya nükla tajung akaba lenir ka liasü aser pa takum alidang Konyak kin aser Naga nunger asoshi loktiliba nung temelenshi jenti bener arutsü, ta ashi. Asür Noke Wangnao ya yimten yimsüsür takotet ka liasü aser Mon district kübok 43 Tapi Assembly Constituency nungi Nagaland

Legislative Assembly nung ter ben shima liasü aser Nagaland sorkar jenjang balala nung tenzüka liasü. Pa asüba ya Naga nunger asoshi lenir tajung ka samaogo aser asen molungjang nung teti alitsü. Naga Students' Federation ajanga asen lenir nem akhum agütsür aser mangyimer kibong den asükhu lemsatep. Tulusang Tsüngremi asenok nem iba takoksa koktetsü asoshi tashi agütsütsü aser tang asen lenir kotak nung tatem maka tesunep nung anisüngzüka lir ta amanga tamolung anisüngzüker, ta NSF sangdong ajangasa ashi.

HSLC & HSSLC Examinations 2024 indang form submission anogo atsülangtsür

Dimapur, Luroi/August 29 (TYO): Tamalen sangdonga aliba den bendenloksema ano maneni Nagaland Board of School Education (NBSE) ajanga June ita agiba HSLC & HSSLC Examinations 2023 nung Regular Repeaters, Centre Repeaters, aser temsüa aliba Compartmental Candidates ajunga dang tongtipang osang ka sangoktsüogo. Sangdong ajanga ashiba agi, HSLC & HSSLC Examinations 2024 atema form agütsütsüba tatembang anogo August 31,

2023 tashi atsülangtsüogo. Iba dak alia anogo matsülangtsü, anungji shia aliba categories küboki aitba kaketshirtem dang iba maangka agia HSLC & HSSLC Examinations 2024 nung shilem agitsü asoshi form agütsütsü ajungshir, ta sangdong ajanga ashi. Regular Repeaters, Centre Repeaters, aser eligible Compartmental Candidates temi Regular students den külemi form magütsütsü, ta sangdong ajangasa ashi.

DSC ajanga Dimapur nung dengue tashidak atema khuret abener

Dimapur, Luroi/August 29 (TYO): Dimapur nung dengue cases tali akumba atema Dimapur Sumi Council (DSC) ajanga khuret lemsatep aser district administration aser medical ketdangsurtem dang tekeratiba nung nüngdakba mera agitsü ayongzüka liasü. Mozüki timba dengue tashidak keta aliba shiranger tem agi sünga lir aser nüburtem tim atemer. Dengue

tashidak agi menepba mechi kaketshir aika class nung medenteter. Anungji nüburtem anema alitsü asoshi bilema ketdangsur temi khuret angateta mera agitsü ajungshir, ta DSC ajanga ashi. Dengue tashidak tali aliba tesemtem nung iba tashidak samadaksüba mera balala agia tensa tamajungba mekumdaksütsü DSC ajangasa ayongzüka liasü.

भारतीय विमानपत्तन प्राधिकरण AIRPORTS AUTHORITY OF INDIA

TAILA RECRUITMENT ASOSHI KUMDANGA LIANG

Ochimashir / ashikülaker / touts / agents kari maitsü tiaüzü yanglua parnok ya Airports Authority of India asoshi nübu shimer ama inyaksangshiba Airports Authority of India (AAI) dangi osang arua lir.

Teimla aliba candidates / nüburtem dang AAI tenü nung iba amala tiaüzü recruitment advertisements / call letters / appointment letters / messages taila nem memesüzükdaksütsü sangdonger.

Recruitment dak sendakba nung iba amala advertisement, Document Verification / Interview Schedule, Final results amala ya AAI indang website www.aai.aero nung dang adoktsü.

Mejangjaba source nungi aruba osangtsüsang career ? www.aai.aero nungi jangatsüla. Nisung kar danga iba amala taila / tiaüzü recruitment sang nung shira, parnok dang pei alidak Police Station nung FIR benoktsü ajungshir. Hindi version atema <https://www.aai.aero/sites/default/files/aaiupload/AAI%20Ad-8x8-HINDI.pdf> nung angutsü.

EXECUTIVE DIRECTOR (HR)
CBC 03111/12/0004/2324
NIT No. 04/2023-24

Government of India
Ministry of Food Processing Industries
Panchsheel Bhawan, August Kranti Marg
New Delhi - 110049.

Ministry of Food Processing Industries, Government of India ajanga PRADHAN MANTRI KISAN SAMPADAYOJANA (PMKSY) kübok component balala atema SC/ST categories aser North-East Region nungi application meshir. Guidelines dated 08.06.2022 aser danga osangtsüsang tejangja www.mofpi.gov.in nung angutsü.

Online applications tem <https://sampada-mofpi.gov.in/> nung agütsüba dang agizüktsü.

Online application ya **20.09.2023** tashi nung agütsütsüla.

CBC 16101/11/0001/2324



Ghaznad nung Delhi-Ghazibad-Meerut Regional Rapid Transist System (RRTS) corridor tunnelling tembangba sülen ktdang sütem aser mapa inyakertem pelatepba noksa nung angur.

Cabinet-i LPG cylinder jenjang sen 200 agi ajemtsütsü lemtet

New Delhi, Luroi/August 29 (Agencies): Union Cabinet-i Mongolbarnü consumer tem ajak atema LPG cylinder jenjang sen 200 agi ajemtsütsü asoshi telemtetba agiogo. Jenjang ajemtsüba ya Pradhan Mantri Ujjwala Yojana nung züngsema alirtem atema-a lir aser iba tetezü beneficiary tem nem 14kg-LPG cylinder shia subsidy sen 400 agütsütsü. "Rakshabandhan aser Onam amungba mapang sorkari domestic cylinders sen 200 agi tejemba kümdaktsütsü asoshi telemtetba agiogo. Iba ya linük nung tetsürtem atema PM Narendra Modi nungi

sempet ka lir," ta Union Information and Broadcasting minister Anurag Thakur-i osangbenertem den sensaksema mapang ashi. Centre-isa, Ujjwala scheme kübok angati agi LPG connections tasen lakh 75 agütsütsü. Tang iba scheme kübok beneficiary crore 9.6 lir. Tang Delhi, Kolkata, Mumbai, aser Chennai nung non-subsidised domestic LPG cylinder jenjang sen 1,103, 1,129, 1,102.50, aser 1,118.50 lir. May ita jenjang anaben tashi ajungketba sülen July ita totzü company temi domestic LPG cylinder jenjang sen 50 agi

timba kümtsü. Iba ita tetenzüklen totzü company temi commercial LPG atema jenjang asadangshi saka domestic cooking gas jenjang memelenshitsü. Tomato aser onion amala teti achiba chiyongtsütem nung jenjang tali akümba dak sendakba nung taitzüba aika ajangshia aruba mapang Centre-i tang LPG nung jenjang ajemtsüogo. Opposition bloc, INDIA-i, jenjang mazüoktetba atema BJP sorkar aija aruogo aser taruba state election aser 2024 Lok Sabha election nung iba ya ken o ka kümdaktsütsü imlar.

Home affairs Parliamentary panel züngsem asütsü P Chidambaram shimogo

New Delhi, Luroi/August 29 (Agencies): Congress nungi Parliament nung Rajya Sabha züngsem P Chidambaram, 8buba Parliamentary Standing Committee on Home Affairs (SCOHA) züngsem asütsü atema Rajya Sabha mendenbuba Jagdeep Dhankhar-i shimogo. Taoba Union minister yagi Congress lenir P Bhattacharya melentsü, shiba Rajya Sabha nungi August 18 nü anentsü. Rajya Sabha mendenbubaisa Congress MP Jairam Ramesh, Committee on Science and Technology, Environment, Forests and Climate Change mendenbuba asütsü shimogo. "Lok Sabha Speaker den angatetteper Rajya Sabha mendenbubai September 13 nungi tenzüka inyaksangshitsü asoshi Parliamentary Standing Committees dak sendakba nung Department ti tanaben

amenokshiogo, koba Rajya Sabha mendenbuba tashi kübok lir," ta Rajya Sabha sangdong ka ajanga metetdaksü. SCOHA ya department related standing committee (DRSC) ka lir aser iba yagi domestic policy, internal security aser Ministry of Home Affairs-i telemtetba agiba asadanger. Iba committee ya Parliament of India-i tentetsüba lir aser Parliament züngsemtemi achaayanger. Iba committee ya Rajya Sabha aser Bharatiya Janata Party (BJP) züngsem Brijlal tekolak ser inyaksangshidar. Iba committee nung tang Parliament kübok House anaprongla nungi political party balala nungi züngsem 31 densema lir. Criminal justice laws melenshitsü nükjidong nung bill asem benoka semsaksema mapang Chidambaram tang

SCOHA nung denogo. August 11 nü Parliament monsoon session tatembangbuba anogo Union home minister Amit Shah-i, Indian Penal Code, 1860 melentsü atema Bharatiya Nyaya Sanhita (BNS) Bill, 2023; Code of Criminal Procedure, 1898 melentsü atema the Bharatiya Nagarik Suraksha Sanhita Bill (BNSS), 2023 aser Indian Evidence Act, 1872 melentsü atema Bharatiya Sakhshya Bill (BSB), 2023 ta bill asem benoka liasü. Osang ajanga ashiba agi, SCOHA-i iba bill asem ya Brehostibarnü nungi sensaksem tenzükogo, koba INDIA züngsemtem aikati Bill nungja Hindi nung agütsü atema ashishio aser ashiba agi, iba ya Bills aser Acts ajak English nung amshitsü atema Article 348-i tetuyuba agütsür aliba anema lir.

August 23 ya 'National Space Day' ama amungtsü: Centre

New Delhi, Luroi/August 29 (Agencies): Union cabinet-i Mogolbarnü, ita south pole nung Chandrayaan 3 takok ngua anentetba nüngdem nung August 23 nü ya 'National Space Day' ama amungtsü, ta metetdaksüogo. "Chandrayaan-3 mission atema inyakba ISRO scientist temi otsütsüsa takok tajung ngutetba atema Cabinet-i tenüngsang agütsür. Iba ya alima jenjang nung asenok tashi temaitsü ka lir. Cabinet-isa, August 23 nü ya 'National Science Day' ama amungtsü jenjang agiba pelashishia agizüker," ta Union minister Anurag Thakur-i, Cabinet senden tembangba sülen ashi. "Chandrayaan-3 mission takok ngua benoka inyakba nung tetsür scientist temia teyari agütsüba atema Cabinet nema danga bilemer. Iba ajanga taruba putu tetsür scientist tem ajungmesotsü. Cabinet-isa, Indian Space Programme dak sendakba nung nükla tajung yur inyakba aser pa lenisüba tajung asoshi PM nem tenüngsang agütsür," ta minister-isa ashi. August 26 nü Bengaluru nung ISRO command centre semdangba mapang Ato Kilonser Narendra Modi-i iba osang ya sangdonga liasü. "Tanü tendak nung koba

linük science & technology luyim nung tangar dang nungi tejakdang südir parnoki otsü tasen yanglur.. Lanurtem science & technology & space nung shilem agitsü atema ajungmesotsü asoshi onoki Chandrayaan-3 lander ita nung anenba anogo August 23 nü ya National Space Day ama amungtsü telemtetba agiogo," ta Ato Kilonser-i ashi. PM-isa, ISRO scientist tem nem tenüngsang agütsü aser Chandrayaan 3 ita nung takok ngua anendaktsüba nung sendaka alir ajak nem tenüngsang agütsü liasü. Paisa, Isro Telemetry Tracking and Command Network Mission Control Complex (ISTRAC) nung ISRO scientist tem den sensaksema liasü. "2019 küm ita nung Chandrayaan-2 tsüngnep toktsüba tesem dang ya 'Tiranga Point' ta ajatsü. Nenoki 'Make in India' ita-i bener tuogo," ta Ato Kilonser-i ashi. PM Modi-isa, 2019 küm September 6 nü Chandrayaan-2 mission indang 'Vikram' lander ita nung anenba reprangtsü atema Bengaluru-i lua liasü. Ajsüka September tenet nü iba lander ita nung anentsü minute ishika dang lia ita nungi pilar km 2.1 shi anunga lia ISRO-i iba craft den tongtepratep mesüteti aküm.



Tir Droupadi Murmu-i taoba Andhra Pradesh Chief Minister Nandanuri Taraka Rama Rao (NTR) küm 100 ajungba nüngdem nung 100 rupee coin ka sayaba sülen nüburtemi iba coin aliba noksa nung angur.

Nuh azütokshi lendong nung Congress densema lir: Anil Vij

New Delhi, Luroi/August 29 (Agencies): Haryana home minister Anil Vij-i Mongolbarnü opposition Congress aija ashiba agi, Nuh aser iba temeket nung aliba tesemtem nung lokti tentet ana tsünga mangatettep adokba Bushisüngdangba sülen congress densema aliba ngutetogo. Iba lendong nung nisung trok taküm samaogo. Osangbenertem den sensaksema mapang Vij-i ashiba agi, police-i tang tashi nung nisung 510 puogo aser iba ken o dak sendakba nung FIR 130 nungi 140 shi benokogo. Paisa, Congress MLA Mamman Khan-i azütokshi lendong atalokba tesem semdangba ngutetogo, ta ashi. "Bushisüngdangba sülen onoki nisung 150 shi puogo aser FIR 130 nungi 140 shi benokogo. Ken o ashishiba sülen iba mepetmesü ya Congress-i tenzükdaktsü asütsü ama ngutetogo. Iba dak sendakba nung police-i August 30 nü Congress MLA Mamman Khan jaoka lir," ta pai ashi.

Kasa mapang nung chief minister Manohar Lal Khattaria Hombarnü Congress aitsüogo aser iba lendong nung Khan densema aliba dak sendakba nung ola atoktsü atema takhangba ka agütsüogo. Khattar-i ashiba agi, Congress MLA ka nem police-i notice agütsüba dang masü iba party nungi MLA tem kar iba ken o nung densema alitsü akok ta kuli ngutetdar. "Congress-i iba ken o dak sendakba nung ola matoker. Parnok anema taitzüba atokaka Congress party-i ola matoker. Parnoki telanzüba magütsüba tetezü temulung malemtsü langkabo lir," ta pai osangbenertem dang ashi. Haryana kübok Nuh aser temeket nung azütokshi lendong ataloka liasü. July 31 nü Vishva Hindu Parishad (VHP) procession ka ayongzüka agiba mapang lokti kati iba sentong nung shilem agirtem amak aser home guard ana aser cleric ka densema nisung trok asü.



New Delhi nung Toyota Kirloskar Motors-i yangluba alima nung mezüngbuba BS 6 Stage II 'Electrified Flex Fuel Vehicle' sayaba sentong nung Union Minister of Road Transport and Highways Nitin Gadkari aser Union Minister for Petroleum and Natural Gas Hardeep Singh Puri nati shilem agiba noksa nung angur.



TIR YIMYIM YIMOBILEM (EDITORIAL)

DIMAPUR RASEMNÜ, LUROI(AUGUST) 30, 2023

Shisalemsatepba senden

Tang Nagaland nung Neiphu Rio-i aniba government dak tajung kaji, nübortem asoshi tongtibang telemtetba agitsü nüngdakba ken o nung telemtetba magidang tamasa Naga nung loki tentetem (Civil Societies) anioka shisalemsatepba inyakyim ya asütsü. Ibaji dang masü saka terenlok mapatem inyakyim nunga district shia nung District Planning and Development Board tashi nung loki tentetem anioka külemi pei pei district anepalu tenzükbaji shisa taka mapa ka lir. Aji oda, yimten maparen ajak nung loki tentet lenirtem züngoka amshiba jagi yimten khuretji külem khuret kümer telemtetba agir, anungji jungli külem aser mejungli külem ta kati ka aitsütepa masü saka kati ka ajungshitepa aotsüsa akümer. Iba jagi Nagaland government dak tamakok aika liaka, tangbo Nagaland nung state government anema lokti tentetemi jembiba aser akhi mapang amato longkak aitba mangashir aser majangshir. Ibaji Nagaland government o Nagaland nung Naga nung loki tentetem na tsüngda tangatetep aliba ajanga lir. Iba jagi meteta aser memeteti nübortem tesem aika nung ajangzükdagi ta bilemdi. Ajisüaka, ano külen lokti tentetem dang tama asüngdang külenang yimten telemtetba agiba nungji meteta aser memeteti tamakok aser takoksa ajuruba angur. Ibaji bendangtet nungang Nagaland nung yimten yimsüsür aser lokti tentet mapa na bendangtetsü aser kati ka akümtsübutepa nübortem asoshi mapa shitak inyaka otettsü. Alima nung yimten ya nübortem temzüng ozüng ka kübok yimjung nung liromedema lidaktsütsü atema kümeteba menden ka lir, anungji iba yimten menden nung amenertemji temzüng ozüng yanglur yimten yimsüsürtem lir. Ajisüaka, nisung dang asünungji yimten yimsüsür ajakbo shisakar aser tashitemeteterbo masütsü. Ano, tashitemeteter asünunga, alima nung ajak meteta aliba tashitemeteter aser tashi-tawarbo mali, anungji shiba südir sang, tangar dang mapa ka mesüra ka nungbosa asüngdangteper külenang telemtetba agitsü mesüra inyaksü nüngdaker. Iba jagi Rio-i aniba Nagaland government nung alir yimsüsürtema lokti tentet lenirtem nungi shisatsü nüngdaka shisalemsateper asütsü. Aji junger. Ajisüaka, lokti tentetem nung lenirtemjia Nagaland asoshi temzüng ozüng yanglua inyaka aotsüba onük aser maparen nung mongintembo (experts) masütsü akok. Tatishitsü agi, Nagaland nung ali telong nungi totzü atsüteta agitsüba maparen nung tamasyongi lokti tentetem den shisalemsatep tenzükra, ali telong nung totzüji kwi lir aser komaser agitettsü aser iba tajangzük aser takoksaji kechi asütsü ? ta asüba onük nung masü saka tangalen katiang oa adoktsüa akok, kechiyong parnokji item mapatem nung mongin masü. Kasaji, Nagaland nung election agia Urban Local Bodies akümtsü indang lokti tentetem den jembilli aser telemtetba agili ta asür saka mapa küma meinyaktetter ta tang tashi tamakok nung lir. Ano, kasa tebilemtsü onük jembillsü asoshi taruba ita September 1 nü Kohima nung state government-i tongtibang lokti tentetem ajak jaoka lir. Ajisüaka, state government-i yamai ka Nagaland Municipal Act-ji südi nie ta tezüluba nung (draft) bener arua melemtsü tashibo telemtetba magitettsü. Taoba küma kasa onük nung lokti tentetem jaoka shisalemsateper ajaki mulunga Nagaland nung ULB election agitsü lemtetogo ta metetdaksü saka magitet. Aji kechiba ? Koba maparen aser onük nung südirsüaka mongintem lir, anungji tamasa item mongintem shisatsü aser teyari amshia nübortem nem tangatetba agütsüsüla. Tetezü, Nagaland nung state government-i ayongba Consultative senden ya MLA-tem o Civil Societies na tsüngda masü saka iba kasa maparen nung mongintem o Civil Societies lenirtem na tsüngda amentsüla. Iba jagi dang nübortemia government sentongji tajungba angatettsü. Atangji, maparen ajak nung tatar senden nung ozüng küma melatet tsüngda government-i yimjak nung yimkong tebilemba meshia metetdaksütsü, aji democracy nung government inyakyim, anungji senso ajaki idangji kinük nung nungsen dang jembia mekazüi yimjak nung pei bilemba aser tangatetba lemsateptsü tim. Peisasa pei yimten yimlilji yimsüsürtemia aser nübortemia yamaji yanglur.

OLEMSABANG

YIMJUNG MEIMERTEMI MOA

~ R. Nungshi Longkumer

Asenok ajaki yimjung aginer tabo jembir, saka yimjungbo memeimer ibajagi yimjung jagi asenok nungi jena oa adoker aser asenok den yimjung melii akumer. Oda asenok ajaki metetba ama alima nung meimchirtem rongnung tulur takartemi pei kidang kilir ana asem tashi ayur, saka tulur takar kari pei kidang alir kilir denji achiyongtsü nunga sadang saria amshir. Ano parnok dangji meima anepalua mepenshir, anungji kilir jagi par kidang mapang tatsüka dang lirbo jena oa adoker. Bushia anir arua ozü kidang liangja ta shiaka melili ta asür. Kechiba? Pari kilirji meima anepalua mepenshiba agi saka ano tulur takar kibong kar lir, paribo kilir asüyonga parnok meimchir asünung (shiruru masü) pei kidang alir kilir denji chiyongtsü nunga kodanga sadang saria mepenshir. Oda pei chiyongba ama külemi lemsatepba chiyonger, ano pei chir ama meima anepalua yaritepba alir. Anungji kiburi kilir dangji küm pungo mesura trok tsüngda nung na-a takumbo Christmas benjong amongtsü ner yimdaki ner kidangi onera oang ta ashiyonga moli ta asür kechiyong par kidangji kilirji jangratema pelaseta alir. Iba jagi par kiji toktsür moner, yamaji asenoki yimjungji teti meima asen mulungjang nug lidakja mapa agi in yaka lira yimjung ta asübaji asenok nungi pilaa moi asenok rongnungsa alitsü. Oda tejen putu nung alima ya temenen agi sunger, nisung o nisung na tsüngda tetsükjitep, meputep agi kati ka arishitepba, tepsettepba ano kin kati kinka makyonga oa maktoktepba jagiang konang küma nüma dang alia aru.


Saka item ajakji mojing mapatem liasü, aser iba jagi alimaji tammang (dark) nung dang asenok lia aru. Saka Tsüngremi meimchirtem iba temenen tammang nungji mesamadaktsünü yong Pei chir Yisu Khrista yimjung bener asenok dangi yok. Saka tesusatsüka alima tesem aika nung meimchir aikadi ano iba yimjungji magizüktetti mezüng jenjang nungsa litepdaki. Oda temeimsüka tesem aika nung aki mapang ama telok kati telok ka arishitepba tepseter, kintem tapayua mapayu rongdoktsür, gari tajung rongdoktsür, yamaji telok tilapurbo (minority) telok tulubapur tsüngdang nungi pei chirtem ang anarongdena anir pei ki toktsür jena aoba angudang, kechiba kasa meimchirtem rongnung yamaji memeim inyakteper ta temulung kanga shiranga repranger.

Saka oda tepelatsükaji asenok Naga lima nung alirtembo Khristai bener aruba yimjung meimer aika dang aliba agi asenok rongnung tetsükjitep, raratep ajak anener dang tashibo yimjung aser tesunep nung dang lia arudaki. Ya asoshi kanga dang pelar aser yimjung meimer, yimjung yanglurtem nem-a tenüngsang agütsür aser Tsüngrem dang pelaseter. Saka asenoki jungjunga mebilemdangra asenok rongnunga yimjung ya raksar rara adoktsü ana nung dang lirko, aser ibaji kong nungi, kechi ajanga adoktsü, shirnok ajanga adoktsü ta süra, telok-telok tsüngda nung mangatetep adoktsü, iba sulenji tetsükjitep adoktsü. Aserbo asenok rongnung yimjung meli-i akümtsü.

Ano nisung rongnung meputep adoksaktsüba tera tulutibaji election ya ka asütsü südi ta onok tambur temibo jungjunga reprangtetaogo. Oda nübör aikadi election mapa ya mangatet nungji, asenok dangi election mapang ya kodang arudir tetsür tebur aika mojing kümer nungzütepeba angütsü. Oda kum pezü pungo meimtepba yaritepba pelatepba liyonga arur kodang election arudir item ajak tu amadoker long agi ontepba ki raksaja, gari raksaja, nisung o nisung na züktepba, tepsettsüa mapayu litepbaji koda tamashi tuklu lir. Ano angazükba agi yimtsüng kar nungbo party balala asüba agi yangyü zünga balala kumadok, hajira külemi dang oa inyaka aliba tua balala küma adok, joko külemi kodanga mesenzür, ano taaktsükaji sarasademer telok nunga meputep adoker balala küma adok. Asenoki Tsüngrem dak amanga asruba tu aji tashi dang amangtet nu ta jashia bilemer. Sak item ajakji asenoki yimjung memeimba nungi adokba mapa tamajungtem lir. Anungji arungma asenoki yimjung meimdi aser Tsüngrem tenüng sanga pelatepba lidi ta olen tatsüka lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tetongi kibong akumtsü memolungba yong Nigeria pastor ka pasasa asü



**PASTOR PROSPER OBUM
IGBOKE**

Luroi/August 29 (Agencies): Tawa Nigeria pastor ka tetongi kibong akumtsü memolungba yong pasasa asü.

Arishi küm 30 tain pastor Prosper Obum Igboke ya July ita story ana atongtepa aliba ki ka nungi pongzüka yangji asü, ta osang ajanga ashir.

Igboke ya Anambra State kübok Nnewi area nung aliba Pentecostal church nung züngsem liasü, ta Nigerian Tribune ajanga Honibarnü ashir.

Kinunger kati osangbener dang ashiba agi, pastor Igboke-i

tetong ya university azüngba mapang senotsü agi yaria liasü.

Pa ama tain aser pastor kati yamai inyaktsü mamanger, ta kinungeri ashir.

Igboke ya taoba Hokulbarnü parnok aliba tesem nung arem ka nung remogo, ta par kinungeri ashir.

Ajisüaka Igboke indang kinunger katibo pa tekolok meshidakba ajanga iba ki nungi pongzüka asü ta ashir.

Pa tetongi mashioktsü, ta par kinungeri ashir.

"Pa temolung raksaba agi pasasa asü ta parnok ashir. Ajisüaka

iba tetsürla ya kinungertem mangyimba nung dena liasü."

"Pa onok indang alu nung aremba ya pasasa asüba ajanga masü, saka onok yimsü nung iba ama asüba ya tsürabor temi aremstsü maksü lir," ta par kinungeri Facebook nung ashir.

Ajisüaka police temibo iba osang mangashi ta ashir.

"Iba ama osang küdangibo maru aser tang osang agütsüba atema pelar. Ni iba osang ya police manager nem agütsütsü," ta DSP Tochukwu Ikenga-i ashir.

2016 küm arishi küm 49 tain Nigerian pastor Basseyya ya par Lagos home nung soseta asü, ta News Break ajanga ashir. Basseyya-i pa atema arogo sen amshi ta arogopuri tai tonglokja liasü.

Pa anepdang 3:00 ako meta yipteni ai saka anepdang 5:00 ako meta kotari ka amshia pa tekong nung arang.

Pai kaket nung "Kü kinungtsü masü küsasa inyak," ta shia liasü.

Haiti nung mapa tamajung inyakba anema longkak aiter dak injang khaloktsü

Port-au-Prince, Luroi/August 29 (Agencies): Port-au-Prince nung mapa tamajung inyakba anema evangelical arogo ka züngsemtem yimtung süa jajaba mapang mapa tamajung inyakba telok (gang) züngsemtemi injang khaloktsü, ta Haitian police-i Hombarnü ashir.

Yimti timbaka mapa tamajung inyaker telok temi amokbanger alidak Honibarnü iba lendong ajuruba nung nisung asüba ano mejangjai lir.

Iba sentong ya Piscine de Bethesda evangelical church lenir Pastor Marco Zidor-i ayongzüka liasü. Zidor-i pa sülen anidakertem ayongden, aser kar nok mesüra süng amer liasü aser parnok ya linük yimtiba north tsütsü Canaan gang indang züngsem kübok aliba tesem leni oa liasü.

Ajisüaka iba gang züngsemtem südi ta temolung melemi alirtemi iba telok dak 'automatic weapons' amshia injang khaloktsü. Iba gang

ajanga video tem prokshiba nung nisung tasü mang aika nangdena liasü.

Osangbener temi Piscine de Bethesda church lenir dang iba tatalokba indang asüngdang, saka pai tangbo osang kecha magütsütettsü, ta langzüa liasü.

Hombarnü Haitian National Police ajanga iba azüdokshi aitsü aser par sepaitemi azüdokshi nungi pila alitsü meranga aru ta ashir.

Police temi security perimeters yua liasü aser arogopur tem dang azüdokshi malitsü mechi iba tesem leni maotsü ajungshia liasü, ta police sangdong ka ajanga ashir.

"Ajisüaka longkak aiter temi ajanga ao aser gang tem den rarateptsü asoshi iba tesem tonga ao," ta ashir.

"Iba mapang nisung aika khaset aser kar yiru. Tamanger kar pua lir," ta police-i ashir. Iba lendong nungi takum jenburtem rongnung Zidor dena

liasü, aser government prosecutor Roosevelt Zamor-i pa Hombarnü okadaki jaok aser pa ajanga tamangertem südaktsü ta tai tonglokja aliba asüngdangyatsü.

Human rights telok, Je Klere Foundation ajanga prosecutor tem dang iba azüdokshi adokdaktsür pua merenshitsü takhangba agütsü aser Tsüngrem o jembidang rongrong adoktsü ajungmesoba ya aibelen lir aser Haitian Criminal Code kübok merenshitsüla, ta ashir.

2023 küm tenzüker Haiti nung nisung 2,400 dak tema tepsetogo, kong mapa tamajung inyakba telok balalai azüdokshir, ta UN-i ita tetenzüklen shia liasü.

Haiti yimtiba Port-au-Prince shilem 80 shi gang temi amokbanger lir aser parnok senotsü meshitsü yong nisung apuba, gari tem soita rakzükraktemba, tashiyim amshia shi nung medemba aser ayuaba mapatem kanga bulua lir.

ANOGO ABEN TSÜNGREM DEN

Ne Tenük Rangketa Yokang

T.Ken 123:1-4

Ne tangatetba nung timtem lira, azüklen rangketa yoktsü merangnang. "Ne dangi kü tenük rangketa yoker, O na, shiba anüng tem nung alir" (t.1).

Kibuba dangi ne tenük rangketa yokba tetezü kechi ? Mezüngbuba, ibai Pa tematiba tashi ta metetba lir. Asenoki asen tenük temalen rangketa yoker kechiaser Pa asenok dang nungi temaba. Isaia pa tenük Tsüngrem chuba menden nung ranglok aser Tenla Kidang Pa temaba nung ajungketa angu (Isa.6:1). Pa tematiba master lir; asenok Pa kilirtem lir. Pa Teyanglur; asenok teyanglubatem lir. Pa kotaker Tebu; asenok Pa chirtem lir.

Asenoki Pa teperiba ta agizüker. "Ajiang, kilirtem tenük pei teka kibur teka repranga ali ama, kilitsürlai pei kiburla teka repranga aliba ama; yamaji onok tenük Kibuba asen Tsüngrem dang, Pai onok dak taochi maka tashi repranga alir" (t.2). Pa teperiba asü nung asenoki Pa dak repranger. Asen nüngdak ajak Pai agütsütsü akoker. "Kü Tsüngremi Khrista Yisu nung Pa sentsüwangshi nung Pa rongsen yari nenok tenügdaktsü ajak agütsütsü" (Fil.4:19).

Tasembuba, kodang asenoki asen tenük Kibuba dak ranglokdir, asenoki Pa temoatsütem agizüker. "Onok dang aochiangma, O Kibuba, onok dang aochiangma," ta ken züluri tekong 3 nung sarasadem. Tsüngremji tagütsünü, tajung aser tabensa sempet agütsüba Tsüngrem lir. "Nenok mejungia, nenoki nenok chirtem nem sempet tajung agütsütsü metetra, nenok Kotaker Tebu shiba kotak nung lir Pa dang meshirtem nem Pai koda tajungba magütsütsü!" (Mathi 7:11).

Tanü nai temaba Tsüngrem metettang. Pai azüoker. Pa teperiba angatettang. Tanü na kechi nüngdaker Pai agütsütsü akok. Pai agütsüba agizükang. Shirnoki parnok inyakba ajak nung Pa sentsüwangshidaktsür,

Mongolia-i Pope Francis aotsü renemer, sarasadem akhanger

Vatican, Luroi/August 29 (Agencies): Pope Francis-i sarasadem akhanger, shiba "the heart of Asia" ta ajaba Mongolia semdangtsü renemer.

Pope-i August 31 nungi September 4 tsüngta Mongolia yimtiba, Ulaanbaatar semdangtsü, koba pa alidak Vatican City nungi mile 5,600 shi lir.

Vatican nung hopta shia jembiba Angelus address August 27 nü jembiba sülen pai "Ibai kanga jangra aliba tesem ka semdangter alitsü," ta shia liasü.

Iba mapang ni arogo ka semdangtsü, koba züngsembo ajema lir, saka tamangba aser dangar dang yariba nung tulu inyaker, aser ano tamangba yimsü akhanga amshir t a s h i t e m e t e t e r ajurutsü," ta pai ashir.

Pope Francis-i anogo pezü Mongolia semdangba mapang sorkar ketdangsurtem Francis-i ashir.

ajurutsü, tamangba yimsü balala tsüngta jembishinü akatsü aser Catholic nunger nütsüng tilaka atema Mass agütsütsü. Nütsüng yongsük million asem shi aliba Mongolia nung Catholic nunger 1,450 dang lir.

Catholic nunger arogo otsü nung Mongolia semdangba pope mezüngbubaji Francis ya akumtsü. Mongolia ya Russia aser China tetsüngta nung lir.

"Ni Mongolia nung aliba adianu aser adianutsür tem den jembiner, ajak asoshi adianu ka ama ni nenok dangi arutsü," ta Francis-i St. Peter's Square jakdang nungi ashir.

"Temeim agi ni jaokba asoshi ner ketdangsurtem dang pelar, shirnoki ni arutsü renemtsür. Ni iba tesem semdangba nung nenok sarasadem adentsü ni asüngdangter," ta Pope Francis-i ashir.

AO OSHI ANGAZÜKDAK:
TANÜ ANGAZÜKTSÜBA OJANG



Rüsem

(n) ayong nung ango südaksütsü atema arür asettsü yangluba sadem (structure for pounding poisonous fruit during community fishing)

* Yimkong tzüyoki aodang **rüsem** tama yanglur.

Rürsa

(v) mesen agi chipoktsü (eaten away by mites)

* Shipo agi süng ajak **rürsar** liasü.

OLONG PAITEP # 6620

	1			2	3				
4			5						6
					7				
	8								
	9			10				11	
					12				13
14									
					15				

TIPILEN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsümapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. _____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsüngda jatepba - (4)

OLONG PAITEP # 6619 TELANGZÜBA

TIPILEN :

- 1. Aben, 4. Artsü, 7. Lisem,
- 8. Liwa, 9. Sarasadem,
- 12. Aket, 14. Mangu, 15. Anünü,
- 16. Ango.

LANGTSÜNGLEN :

- 1. Arulli, 3. Balala, 5. Suwar,
- 6. Belem, 9. Sujuk,
- 10. Aonung, 11. Dokan,
- 13. Tinu.

Happy Birthday

TENÜNG : IMNASANGLA
KÜM : 1
Anogo : 30 August
Talidak : Old Showuba

Happy birthday IMNASANGLA, Tsüngremi arishi talang den taküm temoatsü aser takok nung len aniang ma.

- From Anoker, Tutu & Benben

Tepela Tasoba Anogo

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jella e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Guwahati nung taila sen amshir 2 apu; FICN Rs 10 lakh angu



Guwahati, August 29, 2023
(Agencies): Guwahati yimti nung taila sen amshiba maparen ka puteta nisung ana puogo.

Guwahati police-i taila sen amshiba maparen putet aser

Fake Indian Currency Notes (FICN) Rs 10 lakhs tashi ngutetogo.

Guwahati police-i Gorchuk police station anasa nisung ana ket nung taila sen bena aliba apu.

Tena ya Sariful Islam aser Sajadul Islam ta jangjaogo aser tenaprong Lakhimpur district nungi lir.

"Gorchuk PS nungi WGPD team kati Md Sariful Islam aser Sajadul Islam na apu aser tena ket nung FICN 10 lakhs ngutetogo" ta Guwahati police-i sangdong ka nung metetdaksü.

August 22 nü Assam Police indang Special Task Force (STF) team kati Goalpara district nunga taila sen amshir nisung asem apu. Parnok ket nungi FICN bundles 29 ngutet aser ibaji Rs 14.5 lakh (Rs 500 denomination) liasü.

Smuggling of fake currency notes and its circulation has badly affected the country's economy.

Assam nung mapang shia FICN shibelenba maparen puteta arur aser iba dak sendakba nung nisung aika puogo.

NIA-i Ansarullah Bangla Team züngsem 2 anema chargesheet benok

Guwahati, August 29, 2023
(Agencies): National Investigation Agency (NIA)-i Assam nung Al-Qaeda den sendaktepba telok ka nungi züngsem ana anema supplementary charge sheet agütsüogo.

Akbar Ali na aser Abul Kalam Azad na April 5 nü apu aser tena anema supplementary charge sheet benokogo.

Tena ya Ansarullah Bangla Team (ABT) züngsemtem liasü aser Assam kübok Barpeta nung amenoker mapa inyak. Iba telok ya Bangladesh nunger Saiful Islam lenisüba kübok liasü aser pa ya 'Shaikhul Hind Mahmudul Hasan Jamiul Huda Islamic Academy' nung Arabic

tesayur ka aser Dhakaliapara Masjid nung Imam ka ama inyaka aru, ta ketdangsürtemi ashi.

NIA-i Ansarullah Bangla Team (ABT) nung Bangladeshi nunger tanishirtem bushitepar.

NIA-i Akbar Ali aser Abul Kalam Azad anema benokba supplementary charge sheet nung Indian Penal Code aser Unlawful Activities (Prevention) Act kübok arlla balala shia lir.

"Md Akbar Ali aser Abul Kalam Azad nati tangar den külemi Ansarullah Bangla Team (ABT) ajungkettsü aser kiralongratsü mapa inyak. ABT ya Indian Sub-Continent (AQIS) nung Al-Qaeda den

sendaktepa lir" ta NIA otongdar kati ashi.

Tenati Al-Qaeda aser ABT tashi itdaksü aser lanurtem nem kiralongra mapa inyaksü tesayuba agütsü, ta paisa ashi.

"Bangladeshi nunger Zakir (Mehdi Hassan/Aminul Islam) aser Mehboor Rahman (Mehboob Alam/Sultan) lenisüba kübok Muslim nunger anisatsü merang" ta NIA otongdarisa ashi.

Assam Police-i March 4, 2022 nü iba dak sendakba ken o benoka liasü aser NIA nem agütsüba sülen parnoki March 22, 2022 nü re-registered asü.

Bangladeshi senso Saiful Islam-i Assam kübok Barpeta nungi iba telok ketdangsüa liasü.

EC teshimtet telok kati Mizoram assembly election osang agiteper

Aizawl, August 29, 2023
(Agencies): Chief Election Commissioner Rajiv Kumar-i anir Election Commission telok kati tanü Aizawl semdangi aruogo.

Iba teshimtet telok nung Election commissioner tem-Anup Chandra Pandey aser Arun Goel na dena lir aser

parnoki assembly election maparen repringshimtsü.

August 29 nungi 31 tashi amongdang parnoki Assembly election agütsü aliba atema state sorkari maparen inyakba meyipa repringshitsü. ECI telokisa election den sendaktepa alirtem den ajurutepa sendentem amentsü.

ECI telokisa election administration nung tongti ketdangsürtem dang nungi osangtsüsang metetpelatsü. Chief Electoral Officer (CEO), Superintendent of Police (SPNO) aser Central Armed Police Forces (CAPF) nungi ketdangsürtemi osang agütsütsü.

Meghalaya school & college tem nung NEP tenzüktsü



Shillong, August 29, 2023
(Agencies): Meghalaya sorkari school asercollege tem nung National Education Policy

(N E P) nunga National Education Policy (NEP) tenzüktsü atema inyakdar ta paisa ashi.

NEHU vice-chancellor (VC)-i NEP atema July 12 nü tetuyuba agütsüba meyipa agiang ta MCTA-i takhangba agütsüba atema Shangpliang-i "iba onük jembidar" ta ashi.

"NEHU vice-chancellor-i MCTA pur den olemteptsü jaokogo. Onüktem angatetteptsü imlar anungji iba

ya NEHU indang tebilemstsü südaksüdi" ta Advisor Himalaya Shangpliang-isa metetdaksü.

2016 küm bomb pokdaksüba atema Iraq-i nisung 3 tepsetogo

Baghdad, Luroi/August 28 (Agencies): Iraq-i 2016 küm ISIL (ISIS) telungpurtem sendaka aliba bomb pokdaksüba lendong ka nung densema alir asem tepsetogo. Iba lendong nung nisung noklang aika tepseta liasü.

Ato Kilonser Mohammed Shia al-Sudani indang office sangdong ka ajanga ashiba agi, parnok asem ya Deobarnü aonung aser Hombar anepdang aletseta südaksürtem tenüng mesüra parnok nem kodang obendang agütsü iba indang osang tejangja kecha magütsü.

Muslim nungger temeshi ita Ramadan tatemlen Eid al-Fitr benjung atongtsü lia Baghdad kübok shishilembaba tesem Karrada nung nüburtem aika adenshir aliba mapang 2016 küm July 3 nü iba bomb pokdakja liasü.

Gari nung bomb inoker podaktsüba yagibo nisung aikabo metepset, ta iba lendong atalokba mapang ketdangsürtemi ashi. Ajisüaka

bomb pokdaksüba ajanga mi adok aser shishilembadak prokshia ao aser nüburtem shopping centre tem telung nung sabangatok, kong jongdak amshitsüba kishitem maliasü.

Mi temsepba mapang tashi nungbo nisung 323 süatoker liasü, koba Iraq maka aruba rongnung tesashitiba ka aser 2001 küm September 11 nü United States amakba sülen alima nung tesem balala amakba rongnung nung tesashitiba liasü.

Lendong atalokba mapang nung Police Major-General Talib Khalil Rahi-i ashiba agi, bomb pokdaksür ket nung minibus ka liasü aser parnoki iba bus sünga plastic explosives aser ammonium nitrate bener liasü. Bomb agi poksatsürtem ya karbo maitsü dena mejangjateti liasü.

Iba lendong atalokba sülen Interior Minister Mohammed Ghabban mapa nungi anena liasü. Al-Sudani indang office sangdong ka ajanga ashiba agi, Ato Kilonseri aletseta

südaksür künigertem den ajurutepogo aser kinungertem dang bomb pokdaksüba lendong nung aibelena aliba nguteta parnok aibelen alang tasüba agi temerenshi agütsüba indang metetdaksüogo.

Iraq tamendakdak mejungi aliba mapang ISIL-i 2014 küm Baghdad anütok tip aser anüolen timtem aika agüja liasü.

Iba bomb pokdaksüba mapang tashi nungbo Iraq nungger sepaitemi ISIL puri atsünger aliba tesem timba ka meyipa agiatoker liasü. Iba sülen ISIL puri nüburtem dak rangloker inyaksangshia aruogo.

US-i anir linük balalai military campaign tulu ka tenzük aser 2017 küm tatembanglen Iraq sorkari iba telok madak takok anguba sangdonga liasü.

United Nations-i March ita Iraq aser kidanger Syria nung ISIL kübok züngsem aser parnok pusemer 5000 nungi 7000 shi lir ta asatetogo.

Parnok ya tesadang kabo rarartem lir.

Iba telok den sendaktepa aliba cell temi maneni linük anaprongla nung security forces aser nüburtem tem maka arudar, ajisüaka UN report ajanga ashiba agi, arrtsü adener linük anaprongla nung kiralongrartem anema jenjang tesashi agiba ajanga iba telok ya kanga tashi meiti kümogo.

2021 küm October ita sorkari Karrada nung bomb pokdaksüba lendong nung aija alirtem rongnung tongtiba linük adena orr apuba sangdonga liasü. Iba mapang Ato Kilonser Mustafa al-Kadhimi-i nisungba tenüng ya Ghazwan Alzawbaee ta metetdaksü

asir ashiba agi, iba ken o nung temulung melemi bilemertem aika lir ta ashi.

AFP news agency sangdong ka ajanga ashiba agi, nisung asem aletseta südaksürtem rongnung Alzawbaee densema liasü.

Kasa mapang nung Iraq nungger ketdangsürtemi Baghdad nung ISIL züngsem asem apuba Hombarnü metetdaksüogo.

Parnok asem maitsü memetetdaksü, ajisüaka Iraq indang military-i ashiba agi, parnoki parnok ya iba telok nung züngsem kaka ta nangzükogo aser iba sülen judiciary nem bendanga agütsüogo.

Pakistan court kati Imran Khan tepuokdak nungi chioktsü tuyu

Islamabad, Luroi/August 29 (Agencies): Taoba Pakistan ato kilonser Imran Khan ochimashi mapa inyakba atema küm asem tepuokdak ayutsü temerenshi agütsüba khen atema agienja lir, saka pa tepuokdak nungi chioktsü asü masüar ano mejangja.

Pai aija aliba ken o pai mepishiba ama mejembi tashi Islamabad High Court ajanga bail agütsüogo.

Ajisüaka ano court kati arishi küm 70 tain ya ken o danga ka nung Bodhbarnü tashi mechioki alitsü totuyuba agütsü.

Khan indang okatsür temi ashiba agi, taoba küm pa yimsüsüba menden nungi atsüngdokba sülen pa anema ken o 100 dak tema benoka lir.

Item rongnung sorkar meyong miim inyaksangshi temai adokdaksüba aser rongrong adoka longkak aittsü ayongzükba densema lir. Item ken o dak sendakba nung pa aputsü totuyuba balala agüja lir.

Ajisüaka Khan-i item ken o ajak ya yimtenren tsütsü nungi tenük yoker benokba lir ta ashir.

Taoba ato kilonser indang okatsür temi Supreme Court dang danga ken o kecha nunga pa maputsü totuyuba agütsütsü bushir, saka iba petition jembitsü anogo lateta mali.

Parnoki ashiba agi, Supreme Court ya Mongulbarnü High Court obendang atar aser iba sülen anogo ka latettsü.

"Pa chioktsü onoki kanga imlar. Tang tashi pa danga ken o nung apuba osang onok nem agüja mali," ta pa indang okatsür Gauhar Khan-i ashi.

International jenjang nung cricket asaya arur yimten yimsüsür akumsang ya 2018-2022 tsüngta ato kilonser inyakba mapang danga linük lenirtemi pa nem sempet agütsüba nungi yokzükba sen

mesangdongba mechi August 5 nü küm asem asoshi tepuokdak ayutsü obendang agütsü.

Sempettem ya sen \$635,000 jenjang aser yangji Rolex watches, ring aser cuff links ana densema lir.

Iba ken o nung aitsüba mechi pa election nung küm pongu shilem magitsü tenokdanga agüja lir.

Sorkar anema longkak aittsü ajungmesoa jembiba ken o ka pa anema benoka aliba nung ano high court kati ken o shidak mejembi ta shia iba ken o agientsür anogo ka lir iba osang ya arur.

Khan apuba mesüra lokti lenir mapa inyaksü metemsü kumtsüba nung yimten yimsüsüba nükjidong kecha mali ta ketdangsür temi ashir.

Khan ya tang linük yimtiba Islamabad nungi kilometre 85 shi pilar Punjab province kübok Attock jail nung yua lir.

Pakistan indang parliament ya August 9 nü shibanga taküm agitsü aliba election ketdang asütsü caretaker government ka nem nunglokja lir, saka iba election ya taküm bo magitsü mesüka lir.

US ya China nungi pilatsü meranger masü: Raimondo

Beijing, Luroi/August 29 (Agencies): US Commerce Secretary Gina Raimondo-i Mongulbarnü China ato kilonser ajuru aser alima nung teblemetsü koktettsü asoshi Beijing aser Washington külemi inyaksü ayongzük.

Raimondo-i aruba ya tawa US ketdangsür kati China semdangba tesüsaba alitsü, aser Washington-i alima nung rongsenketzüng tulutiba jenjang tanabuba nung aliba linük den tensa tajungba akumtsü meranger.

Mongulbarnü lai China ketdangsürtem den senden mena Ato Kilonser Li Qiang ajuru aser tashi tulu linük ana tsüngta osangtsüsang agiteptsü tongtipang lir ta nenshia ashi.

Tzü-mopung melenba,

Artificial Intelligence aser fentanyl addiction amala "global concern" indang jembidang, meimchir ajunga asoshi shidak inyaksü atema Washington-i ner den külemi inyakner, ta lai Li dang ashi.

"Item teblemetsü koktettsü asoshi alimai asenok dak imlar," ta lai ashi.

US-i China indang rongsenketzüng nungi pilatsü meranger masü, ta Raimondo-i nenshia ashi.

"Onoki China den sen billion \$700 jenjang commercial tesendaktep alitsü meranger aser asenok tesendaktep ajanga tesendaktem ajunga asoshi tashi agütsütsü amanger," ta lai ashi.

Mongulbarnep Raimondo-i China indang Vice Premier He Lifeng ajuru aser US-China

shishilempaba tsütsü tesendaktep ya alima nung kanga tongtipang lir ta ashi.

"Iba tesendaktep anepalutsü ya asen linük anaprong asoshi aser alima ajunga asoshi kanga tongtipang," ta lai ashi.

US-i kodanga asen natonal security kumzuka ayuba nung atsüanem makatsü saka Washington-i China indang rongsenketzüng soita ayutsü meranger masü, ta lai nenshia ashi.

He-ia rongsenketzüng tsütsü tangatetep ka nung alitsü aser amalitep akatsü asoshi inyaksü Beijing-i molunga lir, ta ashi.

Raimondo ya Mongulbar nikongdang China rongsenketzüng tesep Shanghai-i ao aser Bodhbarnü lar linük bushia aotsü.



North Korea sorkari agütsüba noksa ka nung North Korea lenir Kim Jong Un-i (tiyong) navy headquarter semdangba noksa nung angur. Iba sentong nung Independent journalist tem marudaktsü aser noksa ya North Korea sorkari prokshia liasü. Iba noksa ya kodang tangokbar mejangjateter saka noksa nung KCNA (Korean Central News Agency) ta zülua liasü.

IN THE COURT OF THE MOTOR ACCIDENT CLAIMS TRIBUNAL - COM II ADDL. DIST. COURT, SANGAREDDY M.V.O.P. NO. 99 of 2020

Between :
Leela Vijayakumari ...Claimant
and
Asif and others ...Respondents
NOTICE

To,
Instant Transport Solution Private Ltd., owner of Heavy good vehicle, Container No. NL-01-AD-3231, Chandmari Nagaland, Kohima- 997001

...Respondent No.2
Whereas the claimant filed the M.V.O.P. No. 99 of 2020 against you on the file of the Hon'ble 3-II Addl. District Judge, at Sangareddy claiming compensation on account of death by him in a motor vehicle accident and the said M.V.O.P. is now stands posted on 14.09.2023 for your appearance.

Hence you are hereby informed to appear before the Hon'ble 3-II Addl. Dist Judge at Sangareddy on 14.09.2023 at 10.30 a.m. either in person or through counsel, failing which, the matter will be decided ex-parte as per law.

(By order of the court)
Ch. Nagender, Advocate
H. No.4-9-40, Prashanthna Sangareddy, Ph. 9395544419

National Sports Day amungba mapang asayartem tushi



Dimapur, Luroi/August 29 (TYO): National Sports Day amungba anogo state nungi saisapong balala nung takok tajung anguba asayartem nem tetushi agütsüogo.

Iba sentong ya Indira Gandhi Stadium Hall 'B, Kohima nung August 29 nü agi, kong K. G. Kenye, Minister of Power and Parliamentary Affairs alakteta jaoker liasü.

Sentong nung o jembiba mapang Kenye-i iba anogo ya koda tongtibang iba indang lemsatepba den Nagaland nungi Dr T Ao aser Chekrovolu Swuro nung amala asayartem takok tajung anguba densema saisapong balala nung asayartem takok tajung anguba atema tenüngsang agüja liasü.

Paisa, tang asayartem dang taküm libaliro azioka alitsü aser temulungtetba tulu nung asayatsü ajungshiba den sorkari parnok nem teyari agütsütsü bendanga agütsür lir ta ashi. Tatem nung pai sorkar tenüng nung tetushi agizükker ajak nem

kongnang tetushi agüja liasü.

Kasa mapang nung S. Keoshu Yimkhiung, Advisor for Youth Resources & Sports-i, lanurtem ajungmesotsü atema tetushi agizükba asayartem kodang tongtibang shilem agir iba indang lemsatep. Paisa, Nagaland nung aliba asayartem nem maongka aser facility tajungba agütsütsü ayongzüka liasü. Yimkhiung-isa iba sentong nugn tetushi agizükertemi state aser linük nem konang bener arutsütsü asoshi bendanga agüja inyakba atema parnok nem tenüngsang agütsü. Paisa, global sporting stage nung India nem teyari agütsütsü ajungshia liasü.

Asaya balala atema ajak senteper asayar 391 nem senpet agüja liasü. Caoche tem rongnungi State Award angurtem rongnung Holshe Khrieo, Junior State Coach (Sepaktakraw); Visabiu Peseyie, Junior State Coach (Taekwondo); Mughato Aye, Sports Coach (Football); C Tongjen Thai, Sports Coach

(Athletics) aser Virender Kumar, Head Coach (Wrestling) nung densema liasü.

Sentong nung 2020 nungi 2022 küm tsüingda takok tajung anguba asayartem nem senpet agüja liasü. 61st Edition of Subroto International Cup Football (Junior Boys U-17), 2nd North East Olympic Games, Taekwondo, Archery, Wrestling, Boxing, Athletics, Weightlifting amala asayatem nung takok tajung anguba atema asayartem senpetsüogo.

Ajaki jangja aliba asayatem rongnung 23rd, 24th & 25th Sub Junior National Sepaktakraw, 31st Senior National Sepaktakraw Championship nung densema liasü.

Iba sentong ya Commissioner & Secretary of Youth Resources & Sports Wezope Kenye lenisüba nung agia liasü aser tepela anküp o Youth Resources & Sports Director Kethosituo Sekhose-i jemi.

Dimapur nung Football coaching camp ka tenzüka agidar



Dimapur Government college ground nung football coaching camp akaba mapang football coach tem den football asayatsü jangrartem aser kaketshirtem tangokba noksa nung angur.

Dimapur, Luroi/August 29 (TYO): SVEEP programme nung shilem ka ama Office of the Deputy Commissioner aser District Election Office Dimapur, Nagaland nati Nagaland Sports Association den longjemer Dimapur Government College Ground nung Football Coaching sentong

ka ayongzüko.

Iba coaching camp ya August 20 aser 30 nü agitsü.

Iba coaching camp nung kaketshirtem aser football asayatsü jangrartem school aser college 7 nungi kaketshirtem aikati shilem agidar.

Camp lapokba sentong nung SVEEP State Icon Keneinguze

Pienyu-i okila jembia liasü.

Anogo ana agitsü asoshi ayongzüka football camp ya Nagaland Sports Association tir Christine Imlikokla, Technical Director Mike Mirucki, Assistant Spotter Keneilhukhou Yiethun aser Sentimenba Pongen nung lenisüba nung agidar.

BWF Rankings nung HS Prannoy No. 6 kümogo

Luroi/August 29, 2023 (Agencies): World Championship nung tang mezüngbuba bronze medal ka anguba sülen India nung badminton asayar HS Prannoy, Mongolbarnü sayaba BWF rankings nung jenjang 6bubai tuogo. Iba ya pa atema tang tashi nung rankings nung jenjang temaba asütsü.

Kerala nungi arishi küm 31 tain asayar, shibai World Championships nung world Number 1 aser Olympic champion Viktor Axelsen tsükdakja liasü, pai point 72437 nguteta jenjang asem tejakdangi tuogo.

India nung asayartem rongnungi pa kijai taoba küm December ita nungi tang tashi nung top-10 maitsüi asaya arudar.

Iba mapang tsüingda pai Super-500 Malaysia Masters kokogo aser tawa Australian Open nung tanabuba jenjang nung tembanga liasü.

Tanga India nung kija asayartem rongnung Lakshya Sen jenjang ka asepzüka lua

tang 12buba nung lir aser Kidambi Srikanth World Championships mezüngbuba round nung tsükaka maneni 20buba nung lir.

Tetsür kija asaya nung taoba mapang world champion PV Sindhu, shiba World Championships nung mezüngbuba asaya nung tsüka liasü, la jenjang ka tejakdangi tua tang 14buba nung lir.

Tebur tarep asayar Satwiksairaj Rankireddy aser Chirag Shetty nati World Championships quarterfinals nung Kim Astrup-Anders Rasmussen na mekokaka tena maneni tanabuba jenjang nung lir.

Tetsür tarep asayar Treesa Jolly aser Gayatri Gopichand nata rankings nung jenjang ana tejakdangi tua tang 17buba tongtetogo.

World Championships round of 16 nung tenati tenüng asadangsü langa kanga junga asayaba sülen iba jenjang ajangzüktetogo. Iba asaya nung tena top-seeded China tsür Chen Qing Chen aser Jia Yi Fan nati tsükdakja liasü.

49th King's Cup atema Stimac-i asayar 23 sangdongogo



Luroi/August 29, 2023 (Agencies): India tebur team head coach Igor Stimac-i, Chiang Mai, Thailand nung September 7 nungi 10 tashi asayatsü aliba 49th King's Cup atema asayar 23 tenüng sangdongogo.

Iba asayamung atema Sunil Chhetri nem anisüngzüka agütsüogo, kechiyong iba mapang nung par mezüngbuba tanur asotsü lir. Ajisüaka pa Asian Games atemabo India team nung maneni adentsü.

Brandon Fernandes aser Suresh Wangjam nata team nung züngoksemogo.

India (ranked 99th) team September 7 nü semi-final nung Iraq (ranked 70th) den 700th Anniversary Stadium nung asayatsü. Kasa anogo asayamung ayongba linük Thailand (ranked 113th) aser Lebanon (ranked 100th) na asayatsü.

Semi-final nung takok anguba team ana September 10 nü final asayatsü aser tamakok anguba team ana tasembuba jenjang atema tokteptsü.

2019 küm iba asayamung nung shilem agiba mapang India team-i bronze medal ngua liasü.

49th King's Cup atema India team nungi asayartem:

Goalkeeper: Gurpreet Singh Sandhu, Amrinder Singh, Gurmeet Singh.

Defender: Asish Rai, Nikhil Poojary, Sandesh Jhingan, Anwar Ali, Mehtab Singh, Lalchungnunga, Akash Mishra, Subhasish Bose.

Midfielder: Jeakson Singh Thounaojam, Suresh Singh Wangjam, Brandon Fernandes, Sahal Abdul Samad, Anirudh Thapa, Rohit Kumar, Ashique Kuruniyan, Naorem Mahesh Singh, Lallianzuala Chhangte.

Forward: Manvir Singh, Rahim Ali, Rahul KP.

BILEMDANGANG

"Tangatetep maliba lokti rajang akümer."